


ELAMBO

 Ezali liteya moko oyo eningisi mitema, oyo Ndeko Pearry auti koteya biso uta na Liloba na Nzambe. Boni ezali solo ete “Totielaka Nzambe ndelo pe tokatelaka Nzambe ntango; nzoka nde Azali Seko, pe tokoki kosala yango te.” Na bongo na mpokwa oyo, tozali kobeleva na likambo mosusu sikawa, ezali elambo.

² Kati na mibu misato nazalaki kozela ete losambo moko ébanda na Tucson, kasi yango oyo. Iyo, biso—bisu oyo. Na bongo totondi Nkolo, Atikaki biso tozela kino ete tokoki sikawa kosepela na yango.

³ Sikawa, likambo moko ezali oyo nakolinga koloba liboso ete tobanda elambo, ezali boye, nandimi ete tomoni makambo ebele na eleko na biso oyo tozali kobika kati na yango, na lolenge ete toselgelaki mpenza kopesa bomoi na biso (nyonso) mobimba epai na Nzambe. To—tosengelaki mpenza kosalela Nzambe. Nandimi ete Apamboli biso na eyano mbala moko na Makomi. Ndenge Ndeko Pearry alobi yango eleki mwa ntango, ete to—tokómi—tokómi na ntango yango. Tokufi miso te, to—to—tomoni ete tokómi wana, to—tokómi.

⁴ Tokoki pe kotala bipai nyonso pe komona yango, ndenge makanisi ya bomoto ezali kotika bato. Ete, to—tokoki lisusu koumela ntango molai te, tokokóma mpenza kati na balopitalo ya bato na maboma, mokili mobimba. Bomoni? Na bongo to—tokómi na ntango na suka.

⁵ Sikawa, ndenge Ndeko Pearry alobaki yango na suka, komona ete makambo oyo ezali ya solo, komona ete ezali ya solo, ezali masapo te. Ezali kaka likambo moko oyo tozali kobanza-banza te. Ezali likambo oyo epesameli biso mbala moko na nzela na Liloba na Nzambe pe emonisami polele liboso na biso, bongo toyebi ete tokómi wana. To—toyebi te soki etikali ntango boni sikawa, mpo ete ekozala lisusu likambo ya kotala saa, bomoni, mpo na koyeba soki ekómi ntango nini. Kasi tokómi . . . toyebi ete to—tokómi wana, tokómi na ntango yango. Soki ezali yengebene na ntango na Nzambe, nabanzi ete . . .

⁶ Mokolo moko moto moko apesaki likanisi na ye nsima na kolukaluka pe alobaki ete soki Nzambe andimaki ye yengebene na . . . soki Asengelaki kokabola ntango, mibu—mibu nkoto ezali bobele mokolo moko. Boye soki moto abiki mibu ntuku nsambo, ekozala bobele mwa miniti moke na ntango ya Nzambe. Bomoni? Ee, pe alobaki ete soki abiki mibu ntuku minei, ekokokana ata na ntango te, oyo Akoki kobeta miso na Ye. Bomoni? Bomoni, tala ndenge elekaka nokinoki, nyonso wana, soki ntango ekokaki

kokabolama; kasi mpo na Ye, ntango ezali te. Na bongo Azali bobele Seko.

7 Nakanisi ete ezalaki Sarah kuna na nsima . . . to, te, Joseph nde, na mpokwa wana, alobelaki ngai ná Ndeko Pearry. Alobaki: “Papa, esika nini, ntango nini Nzambe abandá kozala? Aútá wapi?” Bomoni? “Esengelaki ete Azala na ebandeli, boye te? Boye Asengelaki kozala na ebandeli te?”

8 Nalobaki: “Te. Eloko nyonso oyo ezali na ebandeli ezali pe na suka, kasi oyo ezangi ebandeli nde ezali na suka te.” Kasi, na ntembe te, azali na mibu zomi, ezalaki mpenza li—likambo moko makasi mpo na ye. Bomoni? Pe akokaki koyamba yango ndenge nini, koyeba ete eloko moko ezali oyo ezángá ebandeli? Kaka mpo na ye te, mpo na ngai pe. Bongo, bomoni, ezali mpenza likambo makasi mingi mpo na ngai, ndenge nini mpenza likambo yango ebandá.

9 Sikawa tozali kobeleva mpo na kotala likambo moko awa oyo ezali mpenza ya bulee.

10 Eleki mwa mikolo babengisaki ngai, epai na Moklisto moko boye, moto malamumu mpenza, oyo—oyo naino alia elambo te, pe ayokaki ete biso toliaka yango mpenza—mpenza. Bango baliaka nde oyo babengaka “elambo ya molimo.” Pe yango, mpo na oyo etali *elambo* [na ngelesa: communion—N.D.T.], nakoloba ete ezali malamumu, mpo ete *kosangela* [na ngelesa: communicate] ezali “kosolola na,” bomoni. Pe ndeko yango apesaki ngai Likomi oyo, alobaki: “Ndeko Branham, sikawa okanisi te ete . . .”

11 Sikawa, ntina oyo nazali koloba boye. . . Ezali malamumu, Ndeko Pearry? [Ndeko Pearry Green ayanoli: “Na ntembe te.”—N.D.E.] Bomoni, ntina oyo nazali koloba boye, ezali mpo ete bososola likambo oyo bozali kosala. Osengeli te. . . soki okoti na likambo moko ngulu-ngulu, oyebi te esika nini, eloko nini ozali kosala. Okoki ata kotia motema te soki oyebi eloko oyo ozali kosala te. Kasi osengeli kososola eloko oyo ozali kosala pe mpo na nini ozali kosala yango.

12 Alobaki: “Sikawa soki tolei Liloba na Nzambe, boye oyo tozali kolia wana ezali Nzambe te?”

13 Nalobaki: “Ezali mpenza bongo, misie, ezali ya solo. Kasi totangi awa ete solosolo bango. . . Polo ateyaki ete bato báliáka elambo na Nkolo mpenza—mpenza. ‘Bosalaka boye mpo na kokanisa Ngai,’ ndenge Yesu alobaki. ‘Mbala na mbala bokolia yango mpo na kokanisa Ngai, bozali kosakola kufa na Nkolo kino ekoya Ye.’” Bomoni? Boye, tosengeli kolia yango.

14 Tososoli ete Santu Polo, nde atiaki yango na Lingomba, mpo ete azalaki mosakoli ya Kondimana na Sika. Petelo, Yakobo, Yoane, bango nyonso, (ee, Matai, Malako, Luka) bakomaki makambo oyo Yesu asalaki, lokola bakomeli. Kasi Polo moto atiaki makambo na molongo, azalaki mo—azalaki mosakoli ya Kondimana na Sika. Kaka ndenge Mose akendeke na lisobe mpo

na kozua mpemela ya kokoma ba—ba-Buku mitano ya—ya . . . ba-Buku mitano ya liboso ya Biblia, ee, Polo pe akendeki na eliki pe azuaki mpemela epai na Nzambe, ya kotia Lingomba ya Kondimana na Sika na molongo pe kokokanisa Yango na oyo ya Kala.

¹⁵ Na ntango wana bazalaki na mbeka ya mwana na mpate, oyo Yisalaele bazalaki kotosa lokola ekaniseli. Na ntembe te basalelaki yango mbala moko mpamba, ntango bazalaki kobima na Ezipito. Kasi na nsima bazalaki kotosa yango lokola ekaniseli kati na eleko wana mobimba. Ee, “soki mobeko oyo ezali bobele elilingi ya makambo oyo ekoya,” bomoni.

¹⁶ Nzoka nde, nandimi mpenza ete *elambo* (oyo tobengaka bongo “elambo,”) ezali ko . . . ezali “elambo na Nkolo.”

¹⁷ Sikawa, tozali na malako ya Nzambe bobele misato oyo batikela biso mpo na nzoto: moko na yango ezali—ezali elambo; kosukola makáká; libatisi na mai. Yango nde makambo bobele misato. Yango nde kobonga be, kati na yango misato, bomoni. Pe yango nde malako bobele misato oyo tozali na yango. Tososoli ete yango nde oyo Santu Polo atiaki kati na Kondimana na Sika.

¹⁸ Sikawa, soki tolobi ete “elambo esengeli kozala kaka kolia Liloba,” nandimi te ete moto azali na makoki ya kolia elambo na Nkolo soki naino ayambi Li—Liloba na Nkolo kati na motema na ye te. Bomoni? Mpamba te nako . . . Nakotangela bino likambo moko nsima na mwa ntango pe bokomona. Sikawa, botala malamau. Na bongo, mpo na nini kasi to—to . . .

¹⁹ Soki ezali bongo na ntembe te tokoki kolongisa Armée du Salut. Bango bandimaka libatisi na mai ata ya lolenge moko te, balobaka: “Tozali na bosenga na yango te.” Sikawa, soki tozali na bosenga ya libatisi na mai te, tobatisamaka mpo na nini? Balobaka: “Mai ekoki kobikisa yo te, Makila nde ebikisaka.”

²⁰ Nakondima yango. Ezali—ezali ya solo, Makila nde ebikisaka, mai te. Kasi *tosengeli* kobatisama na mai lokola mosala ya libanda mpo na kotalisa ete mosala na ngolu esalemi na kati. Bomoni? Tosengeli kosala pe bongo mpo na elambo!

²¹ Ntango toyambi Nkolo, Mbeka na biso, kati na biso, na nzela na Mbotama na molimo, kati na biso, pe Nzoto na Ye, ete tozali kobika na nzela na Ye, na nzela na Liloba, tosengeli pe kotalisa yango na elembo mpo ete ezali mobeko. “Bobongola mitema, moko na moko kati na bino pe bobatisama na Nkombo na Yesu Klisto mpo na kolimbisama na masumu na bino.”

²² Polo alobaki: “Yango ezuaki ngai epai na Nkolo pe napesaki bino, ‘Ezali ete na butu wana ekabamaki Ye, Nkolo Yesu akamataki lipa, abuki yango pe apesi yango na bayekoli, pe—pe Alobi: “Kamata bolia, bosalaka boye mpo na kokanisa Ngai.” Mpamba te mbala na mbala ekoliaka bino lipa oyo, bozali kosakola kufa na Ye kino ekoya Ye.” Sikawa tomoni ete, kuna, bato bazalaki koya pe . . .

²³ Ndeko ya motuya wana, ndeko molingami mpenza, ayaki pe alobaki: “Ngai naino—ngai naino nalia yango te, Ndeko Branham, nasosolaka likambo yango te.” Alobaki: “Batéyá ngai ndenge mosusu.”

²⁴ Nalobaki: “Kasi omikanisela, tobelemi mpo na kondima ete Santu Polo moto atiaki yango na molongo na Lingomba ya Baklisto ya ebandeli. Bazalaki kokende lingomba . . . ndako na ndako, kobuka lipa na mitema sembo, pe bongo na bongo. Nzoka nde,” nalobaki, “ye moto atiaki yango solo kati na Lingomba. Na Bagalatia1:8, alobaki: ‘Soki mwanje na likolo ayei pe alobi likambo soko nini mosusu, tika ete alakelama mabe,’ bomoni, bomoni, kaka ye moto atindaki bango ete babatisama lisusu nsima na libatisi na Yoane, ete babatisama na Nkombo na Yesu Klisto.”

²⁵ Bomoni, makambo ezali misato oyo tosengeli—makambo misato oyo tosengeli kosala lokola bilembo: Elambo na Nkolo, kosukola makáká, libatisi na mai. Bomoni? Ezali . . .

²⁶ Bolobi: “Ee, A . . .” Sikawa, Armée du Salut bazuaka yango na esika oyo, “Moyibi oyo azalaki kokufa, ntango akufaki, abatisamáká te, kasi Yesu alobaki ete akozala na Lola.” Ezali mpenza solo. Ya solo. Kasi, bomoni, ye—ye—ye ayebaki Yesu kaka wana, na ntango oyo azalaki kokufa. Bomoni? Yango nde—yango nde libaku bobele moko oyo ye azuaki. A—azalaki moyibi, azalaki mosika, azalaki libanda. Bongo ye, kaka ntango amonaki Pole wana, ayebaki Yango, “Nkolo kanisa ngai!” Pe Yesu . . . Ezalaki ya solo.

²⁷ Kasi mpo na ngai na yo oyo toyebi ete esengeli ete tobatisama, pe toboi kosala yango, na bongo ekozala likambo na yo na Nzambe. Ndenge moko pe mpo na elambo!

²⁸ Sikawa, ntango tozali kolia elambo yango, ezali kaka likambo ya koloba te: “Nakobeleva awa pe nakolia mwa lipa, pe nakondima ete nazali Moklisto.” Kasi, soki botalaki malamumu, Biblia elobi: “Ye oyo akoliaka pe akomelaka *na motindo mobongi te* azali na ekweli na ntina na Makila pe na Nzoto na Nkolo.” Bomoni? Osengeli kobika bomoi oyo—oyo . . . na miso na bato, oyo . . . pe na miso ya Nzambe pe ya bato, oyo ekotalisa ete ozali—ete ozali sembo.

²⁹ Sikawa, tozua lisusu mwa ntango moke. Sikawa, na Kondimana na Kala ntango mbeka etiamaki lokola—lokola mobeko to lokola lilako. Ndenge moko pe libatisi na mai ezali lilako; ndenge moko pe kosukola makáká ezali lilako; ndenge moko pe elambo na Nkolo ezali lilako. “Esengo na ye oyo akotosaka malako na Ye nyonso, akobatela mibeko na Ye nyonso, mitindo na Ye nyonso, ete akoka kozua makoki ya kokota na Nzete na Bomoi.”

³⁰ Sikawa, botala likambo oyo malamumu, ete na ebandeli, ntango ekómaki lilako na Nzambe na ebandeli, ya komema mbeka na

ndako na Nzambe, na tempelo, na etumbelo, pe kopesa likabo na yo, pe—pe mpo na masumu na yo, mbeka ya mwana na mpate. Ee, nakoki komikanisela ndeko moko Moyuda, oyo azali koya na nzela, ayebi ete akwei na likambo, pe akei na etumbelo; to amemi ngombe na ye ya mafuta to ngombe mobali, nyama oyo azalaki na yango, to mpate mobali, mwana na mpate, to nyama moko boye. Nzela-nzela, ayaki na yango na bosembo nyonso, abelemaki wana, na kotosaka lilako na Nzambe na bosembo nyonso.

³¹ Nsima na yango atiaki maboko na ye likolo na yango, azalaki koyambola masumu na ye, pe nganganzambe azalaki kotia yango (masumu na ye) likolo na mwana na mpate, pe mwana na mpate azalaki kokatema kingo, pe—pe na nsima akufaki na esika na ye. Na ntango oyo ye azalaki wana, mwana na mpate azalaki kobunda-bunda pe kotangisa makila, maboko na ye ezalaki kotonda na makila, pe ezalaki kopimbwela ye nzoto mobimba, (mwa mwana na mpate yango azalaki kolela, kobunda na liwa), azalaki kososola ete asalaki masumu pe ete esengelaki ete eloko moko ekufa na esika na ye. Yango wana, apesaki liwa ya mwana na mpate wana na esika ya liwa na ye. Bomoni, mwana na mpate akufaki na esika na ye. Na bongo moto yango asalaki yango na bosembo, na motema na ye mobimba.

³² Sukasuka, esalemaki lisusu mbala na mbala, ekobaki kosalema mbala na mbala kino ete na suka ekómaki momesano. Mobeko na Nzambe ekómaki momesano epai na bato. Pe na nsima ye wana ayaki: “Ee, totala, lelo ezali mokolo *boye*, ntango mosusu ekozala malamumu ete nakende kuna. Iyo, ekozala malamumu ete napesa mbeka ya ngo—ngombe mobali.” Akendaki kuna: “Ee, Nkolo, ngombe na ngai ya mobali yango oyo.” Bomoni, bosembo ezali ata moke te kati na yango, esalemi nde na kozanga kososola.

³³ Nzoka nde, tolingi kolia elambo bongo te. Ezali pe ndenge moko ntango tozali koya na mesa na Nkolo.

³⁴ Yisaya 35...te, bolimbisa ngai, Yisaya 60... Botika nazongela yango. Na—na—nakanisi ete ezali Yisaya 28, kuna nde epai likambo oyo ezali. Nayebi malamumu ete ezali mpenza mokapo yango. Alobaki: “Lilako ezali nsima na lilako; pe molongo nsima na molongo nsima na molongo; moke awa, moke wana. Bosimba makambo oyo ezali malamumu. Na bibebu na bapaya pe na minoko mosusu Nakoloba na bato oyo. Pe Kopema yango oyo.”

³⁵ Alobaki: “Mesa nyonso na Nkolo etondi na kosanza. Nakoteya Malakisi epai na nani? Nakomonisa bososoli epai na nani?” Bomoni? Nabanzi ete ezalaki mpenza eteni ya Likomi yango, Yisaya 28. “Nakomonisa bososoli ya Malakisi epai na nani?” Bomoni, “bamesa yango.”

³⁶ Sikawa, tozali komona lelo ete likambo monene oyo tolingi kosala na mpokwa oyo, mpo na kokundola liwa na Ye pe Nzoto na Ye oyo tondimi ete toliaka yango mikolo nyonso, to, oyo touti

kolia ntango ndeko na biso azalaki koteya biso. Wana tozali koyamba Liloba na Nzambe, tozali kondima Yango na motema mobimba. Tozali komona Yango komonisama; tozali komona Yango kopesamela biso; tozali komona Yango kotatolama; tozali koyoka Yango kati na bomoi na biso. Pe tosengeli kobelema na yango na koyebaka malamumu oyo tozali kosala, kaka te mpo ete ezali motindo.

³⁷ Okoti na lingomba moko boye, pe mbala mingi bakabolaka mwa bisikíti ya mungwa to lokola mwa e—eloko moko boye, oyo babuki-buki, pe lipa moko ya pepele to—to eloko moko boye, pe—pe babuki-buki yango; pe bato oyo bamelaka makaya, masanga, pe nyonso mosusu, lokola bazali bandimi ya lingomba bakoya pe balei elambo na Nkolo. Ee, ezali mbindo liboso na Nzambe!

³⁸ Ata mbeka yango, Alobaki: “Mikolo na bino ya bulee pe mbeka na bino ekómi nsolo mabe na zolo na Ngai.” Nzoka nde Ye moto apesaki bango mobeko ya kopesa mbeka yango. Kasi lolenge bazalaki kosala yango, ekómaki nsolo mabe, ekómaki kolumba nsolo na zolo na Ye (na nzela ya zolo na Ye), kaka mbeka yango oyo Apesaki mobeko.

³⁹ Ezali na lolenge wana nde tozali kozua Liloba na Nzambe, ebele ya Baklisto lelo (oyo ya maloba) basalaka bongo. Tozali kotelema awa pe koteya Liloba oyo, kasi tozali koloba: “Yesu Klisto azali motindo moko te lobi, lelo, pe libela,” pe tozali koteya makambo oyo Alakelaki biso ete Akokokisa yango, kasi tozali koloba: “Oh, ee, oyo wana ezalaki mpo na likambo mosusu,” kosambela na biso na miso ya bato ekómi bobele nsolo mabe na zolo na Ye. Akoyamba yango te, ata moke te. Ntina nde yango wana, mpo na bizaleli na biso ya momesano!

⁴⁰ Baliaka elambo na Nkolo mpo na momesano te. Baliaka yango nde mpo na bolingo na Nzambe oyo ezali na mitema na bino, wana bozali kobatela mibeko na Nzambe. Bomoni, yango nde ntina baliaka yango.

⁴¹ Na bongo soki bolei yango na bosembo te, ete ezali bobele momesano, “Ee, lingomba na biso baliaka elambo mbala moko, lomingo na lomingo, to sanza na sanza, to mbala mibale na mbula moko,” bongo yo wana obelemi pe olobi: “Ee, ekómi ngala na ngai,” pe—pe na nsima olei elambo, ee, ezali nsolo mabe epai na Nzambe! Bomoni, oyo wana ezali bobele momesano.

⁴² Ata mpo na makambo mosusu, o—osengeli kozala sembo. Nzambe azali na mposa ya bozindo ya motema na yo. Omikanisela, kaka Nzambe oyo amemaki yo awa na mokili, ozali kosalela nde Ye. Bomoni?

⁴³ Ozali kosala yango mpo ete Ye alobaki bongo, mpo ete ezali mobeko na Ye. Na bongo tolingi ete tobelema na bosembo nyonso, na koyeba ete tobikisami nde na ngolu na Nzambe. Pe to—tolingi Ye pe tozali koyoka Bozali na Ye, pe to—tozali komona Yango kobongola bomoi na biso. Bo—bomoto na biso mobimba

ebongwani. To—to—tokómi bato ya ndenge mosusu. Tozali lisusu kobika ndenge tozaláká kobika te, tozali lisusu kokanisa ndenge tozaláká kokanisa te.

⁴⁴ Lokola kati na Buku awa, na esika oyo tozalaki kolobela ete ba—ba—Buku mibale wana ezali bobele Moko, Buku na Bomoi. Buku na bomoi ya liboso oyo eyaki, eyaki ntango obotamaki, ezalaki mbotama na yo ya mokili. Bomoni? Kasi na nsima, na ntango moko boye, kuna na kati mpenza, esika mwa nkona moke ya Bomoi ezalaki, ndenge nazalaki kolimbolela bilenge basi mosusu na ndako na nsima na nzánga oyo. Bomoni, mwa nkona moke ya Bomoi ezali kuna, bongo bozali komituna: “Yango euta wapi? Ma—makambo ya kokamwa nini boye?”

⁴⁵ Nazalaki koloba likambo oyo, wana nazuaki ndakisa na ngai moko, lokola soki balobi: “William Branham, ee, eleki mibu ntuku minei, William branham oyo wana, azali ndenge moko na oyo ya mpokwa oyo te.” Soki moto moko ya eleko wana alobi: “William Branham, azaláká moto mabe,” bomoni, mpo ete nabotámá na Charles ná Ella Branham. Uta na lolenge na bango, ngai nazalaki mosumuki, nayaki na mokili, mokosi, pe mimesano nyonso ya mokili ezalaki kati na ngai. Kasi kuna na kati pe, Lolenge mosusu ezalaki kuna, bomoni, oyo ebongisámá liboso, Nzambe moto atíáká yango kuna na kati. Na nzoto yango moko, bomoni, lolenge mibale kuna na kati.

⁴⁶ Ee, nazalaki komipesa bobele na moko. Wana ezalaki kokola, nazalaki kobimisa maloba lokola bebe: “Da-da.” Mbala moko, nakómaki mokosi, nakómaki nyonso oyo mosumuki azalaka, mpo ete nakolaki bongo. Kasi kuna na kati, na ntango nyonso wana, mwa litónó ya Bomoi ezalaki kuna.

⁴⁷ Nazaláká komikanisela, ntango nazalaki elenge... (Nabanzi ete nazali koumisa bino ntango molai te. Kasi nayebi...) Nazalaki kofanda kati na...na—na libongo ya mokele, nazalaki kofanda wana pe kotála-tala na butu. Papa ná mama, basila kokende kopema. Pe na ntango wana bazalaki basumuki, boklisto ezalaki na bandako na biso ata moke te. Pe, ólalá, masanga, baféti, bizaleli mabe; ezalaki kosala ngai mpsi, nazalaki kozua mwi—mwinda na ngai ná mbwa na ngai, pe nazalaki kokende na zamba, mpo na kolala kuna. Na eleko ya mpio nazalaki kosala bokila kino ete féti esila, ntango mosusu kino ete ntongo etana. Soki nazongi na ndako, pe ete esili naino te, nazalaki kolala likolo ya mwa ndako pe mpongi ezalaki kozua ngai, kozela ete ntongo etana.

⁴⁸ Bongo nazalaki kokanisa ndenge mbala na mbala, wana nazalaki libanda na eleko ya molunge, nazalaki koluka banzete pe kopika yango mpo na kosala mwa esika ya komibomba na mopepe, soki mbula ebeti; nazalaki kolala wana pe nazalaki kotika banzete ya ndobo na mai, nazalaki kolóbo; mwa mbwa na ngai ya bokila ya ba-raton laveur elalaki wana. Nazalaki

komilobela: “Tala. Oyebi, na eleko ya mpio oyo eleki, naláláká awa butu moko kati na hema, napelisáká móto awa ntango nazalaki kozela ete mwa mbwa na ngai ebengana nyama mpo emibomba na nzete, pe natiáká móto awa. Mabele ekaukaki na malili kino na bozindo ya pouce mitano [12,7 cm—N.D.T.]. Kasi, yo mwa felele oyo, outi wapi?” Bomoni? “Ee, yo outi wapi? Nani ayaki kolona yo awa? Pe bauti na yo na ndako ya molunge oyo wapi? To—to likambo nini, yo outi wapi?” Bomoni? Epai na mwa felele wana, nalobaki: “Ólála, mabele ekaukaki, pe nyonso, pe ngai napelisáká móto likolo awa. Libanda na likambo ya mabele kokauka na malili, likambo mosusu ezalaki ya móto likolo na mobimbi monene ya nzete esika nazikisaki yo. Pe ata bongo, yo oyo, pe ozali na bomoi. Outi wapi?”

⁴⁹ Ezalaki nini? William Branham mosusu azalaki. Bomoni? Mwa litónó ya Bomoi na Seko kuna na kati, oyo eutaki kati na ba—ba—ba-gène ya Nzambe, Liloba na Nzambe oyo etiamáká kuna na kati. Moto nyonso kati na bino akoki komikanisela makambo ya ndenge wana. Bomoni, Ezalaki kosala mosala.

⁵⁰ Na nsima nazalaki kotombola miso na banzete, pe kokanisa: “Yo lokasa, namonaki yo kokweya mbula eleki, pe ndenge nini ozongi lisusu wana? Outi wapi? Eloko nini ememi yo awa?” Bomoni, Bomoi na Seko wana nde Ezalaki kosala mosala kati na nzoto.

⁵¹ Bongo, mokolo moko, wana nazalaki kotambola, Mongongo yango elobaki: “Komeka komela makaya to masanga soko moke te, pe bongo na bongo.” Ná bilenge, ná nyonso, ekolaki. Bomoni, Eloko moko ezalaki kosala mosala.

⁵² Kasi nzoka nde, mbala moko natombolaki miso, pe nalobaki: “Ngai nazali mwana ya Charles ná Ella Branham te. Eloko moko ezali kobenga.” Ezali lokola mwana ya mpongo na ngai: “Ngai nazali mwana ya nsoso te. Eloko moko ezali kuna na likolo, na esika moko boye. E Yawe monene, Ózala ata Nani, fungola! Nalingi kozonga na ndako. Eloko moko kati na ngai ezali kobenga.”

⁵³ Na bongo nabotamaki lisusu. Mwa Bomoi wana oyo ezalaki kuna, bomoi ya mai esopanaki likolo na Yango, na nsima Ebandaki kokola. Sikawa, bomoi wana ya kala elimbisamaki, ebwakamaki na mbu ya Nzambe ya kobosana, mpo ete etangemela ngai lisusu soko moke te. Bomoni? Sikawa biso oyo tosembolisami (lokola ete tosálá naino masumu te) Liboso na Nzambe.

⁵⁴ Na bongo ntango tozali koya na mesa na Nkolo, esengeli ete toya na limemia, na bolingo pe na botosi: “Botala esika nini tolingaki kozala soki ezalaki mpo na Ye te.” Bomoni? Botala esika yango elingaki . . .

⁵⁵ Yango wana, Polo, nabanzi, ntango alobaki boye: “Bongo, ntango bokoyangana mpo na kolia, bozelanaka bamoko na

bamosusu.” Elingi koloba, na elobeli mosusu, bozela mwa moke, bobondela, bomitala. Pe soki boyebi ete ndeko moko azali wana, oyo alingi kosala likambo moko ya mabe, to likambo moko boye, bobondela pe mpo na ye. Bomoni? Bomoni, “bozelanaka bamoko na bamosusu,” bozela mwa moke, bobondela. Soki mwa likambo moko ya mabe ezali kati na bino to likambo moko boye, bo—bolia yango te—bolia yango te, bokende liboso kobongisa yango. Bomoni? Bokende naino kobongisa likambo yango, mpo ete tolingi ete toyaka awa na bopeto nyonso, na makanisi na biso epai na baninga pe epai na Nzambe, pe moko epai na mosusu, wana nde tokoya na boyokani ya bandeko zongazonga na mesa na Nkolo. Bomoni?

⁵⁶ Pe tozali kosala yango mpo ete tozali kozongisa matondi epai na Ye, pe bamoko pe bamosusu. Tozali kolia lipa kati na biso, komela vinyo kati na biso, lokola Makila na Ye pe Nzoto na Ye.

⁵⁷ “Soko bokolia Mosuni na Mwana na moto pe bokomela Makila na Ye te, bokozala na Bomoi kati na bino te.” Bomoni? Bomoni, yango nde oyo Biblia elobi. Soko osali yango te, Bomoi ezali te. Bomoni? Na ntango wana, ozali kotalisa mpenza ete ozali koyoka nsoni ya komitalisa lokola Moklisto, mpo na bomoi oyo ozali kobika. Na bongo yango ezali mpenza ntango ya kosukisa likambo. Bongo soki osali yango te, ozali na Bomoi te. Soki osali yango mpenza na motindo mobongi te, ozali na ekweli na ntina na Nzoto na Nkolo.

⁵⁸ Ezali ndenge moko mpo na libatizi na mai. Soki tolobi: “Tondimeli Yesu Klisto, Abikisi biso na masumu, pe tobatisami na Nkombo na Yesu Klisto,” ee, tozali—tozali koyokisa Ye nsoni, tozali kosala makambo ya mabe pe to—tokosengela kozua etumbu mpo na yango. Pe likambo mosusu, soki tosali bongo, tozali komeka koyambola eloko moko kasi tozali kosala eloko mosusu.

⁵⁹ Yango nde kokoso na biso lelo. Oyo nazali kokanisa. . . Nazali koloba “bisó,” ngai, ná lingomba oyo Nkolo Nzambe apesi ngai nzela ya kosolola na yango na bangonga ya suka oyo, mpamba te tondimi ete tozali na ntango na suka. Tondimi ete Nzambe apesi biso Nsango moko. Epesámá na Nzambe, Etatolámá na Nzambe, Etalisámá polele na Nzambe. Sikawa esengeli ete toya epai na Ye na limemia pe na bolingo, pe na—na bopeto ya motema, ya makanisi pe ya molimo.

⁶⁰ Boyebi, etikali moke ete ngonga eko epai wapi—epai wapi awa kati na biso ekozala. . . Molimo Mosantu akoloba polele ndenge Asalaki epai na Anania pe Safila. Bomikanisela, bomoni, bonganga yango elingi kokóma. Bomoni? Pe tozali. . . Sikawa, bomikanisela yango mpenza, bomoni, ete Nzambe akofanda elongo na bato na Ye. Yango nde oyo Alingi kosala sikawa.

⁶¹ Tokoki koyamba Nsango oyo, toloba. . . Soki nazalaki elenge mobali pe—pe ete nazalaki koluka mwasi, nakokaki kozua

mwasi, nalingaki koloba: “Abongi mpenza. Azali Moklisto. Azali mpenza mwasi. Azali nyonso wana, natieli ye motema.” Ata soki natieli ye motema ndenge nini, soki namoni ye mwasi malamumu ndenge nini, esengeli ete nandima ye, esengeli ete ye pe andima ngai; bomoni, likolo na bandai oyo.

⁶² Ee, tomoni ete ezali ndenge moko mpo na Nsango oyo. Tozali komona ete Ezali solo. Tozali komona Nzambe kotatola ete Ezali solo. Ezali mpenza-mpenza solo. Mbula na mbula, mbula na mbula, Ezali kokoba kozala solo, kokoba kozala kaka solo. Makambo nyonso oyo Yango ezali koloba, ezali kokokisama kaka ndenge Alobaki yango. Bongo, toyebi ete Ezali solo, kasi, bomoni, bosala yango na lolenge ya mayele te. Soki bosali bongo, bokozua losambo oyo euti na moto mosusu. Bomoni? Tolingi losambo oyo euti na moto mosusu te, eloko oyo moto mosusu asila kobikela, bongo biso tozali kobika na—na litatoli na ye.

⁶³ Nabanzi ete Yesu moto alobaki na Pilato, likambo moko, liloba moko oyo nazalaki kokanisa eleki mwa ntango, pe Alobaki yango kuna: “Nani ayebisi yo likambo yango?” To, “Yango emonisameli yo? Oyebi makambo oyo ndenge nini?” na elobeli mosusu. Nazali lisusu koyeba liloba yango te, eleki ntango molai kobanda natanga yango, kasi: “Ndenge nini yo—ndenge nini yo oyebi likambo oyo? Likambo nini? Ndenge nini? Nani amonisi yo yango?” Ezalaki na ntina na Ye, ete azali Mwana na Nzambe. “Nani amonisi yo yango? Moto moko nde ayebisi yo yango? To,” ndenge Yesu alobaki, “Tata na Ngai na Likolo nde amonisi yo yango?” Bomoni? Bomoni? “Oyoki yango ndenge nini, na moto mosusu to ezali emoniseli oyo ebongi be kouta na Nzambe?”

⁶⁴ Elambo oyo, ezali kaka eloko moko oyo naye kolia, mobeko moko boye, koloba: “Ee, bamosusu baliaka yango, ngai pe nakolia?” Ezali emoniseli, ete nazali eteni na Ye pe nazali eteni na bino, nalingi bino pe nalingi Ye, pe tozali kolia yango elongo lokola elembo ya bolingo na biso epai na Nzambe, ya bolingo pe ya boyokani na biso, bamoko na bamosusu.

⁶⁵ Sikawa nalingi kotanga kati na Makomi. Pe na nsima, nabanzi... Wapi esika bo... Kaka ndenge Ndeko Pearry akolinga kosala lelo. Nakolinga ete botanga yango elongo na ngai, soki bozali na ba-Biblia na bino. Bakolinti ya I, mo—mokapo ya 11, pe kobanda na molongo ya 23.

⁶⁶ Pe lisusu, na losambo na biso, totosaka yango ntango nyonso, ná kosukola makáká, ntango nyonso, mpo ete yango mibale etambolaka elongo. Nabanzi ete ndeko mobali ayebisaki ete ekosalema “mokolo ya misato na mpokwa” na ntina na bato ndenge batondi pe ndenge bozangi. . . esika oyo ekoki mpo na kotia bato mpo na kosukola makáká, bakosala—bakosala yango mokolo ya misato na mpokwa.

⁶⁷ Sikawa, molongo ya 23 ya mokapo ya 11 ya Bakolinti ya I, boyoka Polo sikawa. Sikawa bomikanisela, pe bosimba yango na

makanisi, Bagalatia 1:8: “Soko biso, soko mwanje na likolo ayei kosakola nsango ekeseni na oyo tosakolaki epai na bino,” (na Nsango Malamu oyo ye asakolaki) “tika ete alakelama mabe.” Bomoni?

Mpo ete yango ezuaki ngai epai na Nkolo, pe napesaki bino ezalaki ete, na butu wana ekabamaki ye, Nkolo Yesu akamataki lipa:

Pe esilaki ye kotonda, abuki yango, . . .alobi, Bokamata pe bolia: oyo ezali nzoto na ngai mpo na bino, bosalaka boye mpo na kokanisa ngai.

⁶⁸ Sikawa, natelema naino awa, mpo naloba boye: kasi kolia nzoto na Nkolo Yesu Klisto kati na elambo oyo, elingi koloba te ete elambo yango ezali nzoto mpenza ya Klisto. Oyo wana nde makambo ya Katoliko. Ngai nandimaka te ete ezali ya solo. Nandimaka ete ezali bobele lilako moko oyo Nzambe apesaki biso, bomoni, ezali nzoto ya solosolo te. Ezali . . . Wana, ezali solo mwa eteni ya lipa kosher. Ezali bobele lilako.

⁶⁹ Nandimaka pe te ete libatisi na Yesu Klisto (na Nkombo na Yesu Klisto) kati na mai, elimbisaka mpenza masumu. Nandimaka te ete moto . . . Nandimaka ete okoki kobatisama moi mobimba . . . Bongo, nayebi ete ntango mosusu bato mosusu bazali awa oyo bauti na eglise Apostolique, to, nalingaki nde koloba eglise Pentekotiste Unie, bango nde bateyaka yango. Kasi, bomoni, na—nandimaka te ete mai elimbisaka masumu. To, soki ezali boye, na bongo Yesu akufaki mpamba. Bomoni? Nandimaka ete ezali bobele lilako ya Nzambe, bomoni, mpo na kotalisa ete olimbisami. Kasi ete moto ábátisama mpo na mbotama ya sika, te, na—na—nandimaka yango te. Nandimaka te ete mai elimbisaka masumu.

⁷⁰ Nandimaka pe te ete lipa ná vinyo oyo ezali na eloko moko ya kosala kati na moto, soki bobele kobatela lilako oyo Nzambe apésá biso ete tosalaka. Bomoni? Ya solo. Nandimaka ete ezali ndenge moko mpo na libatisi na mai. Nandimaka ete totindami kosala yango, ete Asalaki makambo nyonso wana mpo na kopesa biso ndakisa. Pe Asalaki likambo yango mpo na kopesa biso ndakisa. Pe Asukolaki makáká mpo na kopesa biso ndakisa.

⁷¹ Sikawa: “Bobele bongo,” molongo ya 25:

Bobele bongo na nsima na kolia akamati kopo, alobi ete: Kopo oyo ezali kondimana na sika kati na makila na ngai, mbala na mbala bokomela yango, bosalaka boye mpo na kokanisa ngai.

Mpamba te mbala na mbala . . . (Bomikanisela sikawa!) . . . Mpamba te mbala na mbala bokolia lipa oyo, pe bokomela kopo oyo, bozali kosakola kufa na Nkolo kino ekoya ye. (Kino ntango nini? “Kino ekoya Ye!” Bomoni? Bomoni?)

Yango wana moto soko nani akolia lipa, pe akomela kopo na Nkolo na motindo mobongi te, azali na ekweli na ntina na nzoto pe na makila ya Nkolo.

⁷² Natelema naino mwa moke. Ntina oyo alobaki boye, bomoni na molongo mosusu awa, na mokapo mosusu, ete alobaki: “Nayoki ete ntango bo—ntango bozali koyangana, bozali kolia, bozali ata kolangwa na mesa na Nkolo.” Basosolaki yango mabe, bomoni. Bazalaki bobele kolia na lokoso, bomoni. Kaka ndenge bato bazali kosala lelo, bazali kobika bomoi ya lolenge nyonso pe bazali kolia yango. Bomoni? Alobaki: “Bozali na bandako esika ya kolia, bomoni. Kasi, oyo ezali lilako oyo esengeli ete totosa yango, bomoni.” Sikawa:

Tika ete moto amitala ye mpenza, liboso ete alia lipa yango pe amela kopo yango.

Mpamba te ye oyo akoliaka pe akomelaka na motindo mobongi te, akomiliela pe akomimelela ekweli, soko akososola nzoto na Nkolo te. (bomoni?)

⁷³ Ozali nani? Ozali Moklisto, ozali kobika liboso na bato nyonso lokola Moklisto. Pe soki olei yango kasi ozali kobika lokola Moklisto te, ozali kososola Nzoto na Nkolo te. Ozali kotia libanga ya libaku kati na nzela ya moto mosusu, omoni, wana bazali komona yo komeka kosala yango pe na nsima ozali kobika bomoi oyo osengelaki kobika te. Omoni, ozali kososola Nzoto na Nkolo te. Sikawa botala malamumu oyo yango . . . elakeli mabe oyo ekangami na yango:

Yango wana mingi kati na bino bazali na bolembu pe na malali, pe mingi balali. (Ndimbola ya malamumu ya liloba wana, Ndeko Peary, ezali “bakúfi.” Bomoni? Bomoni, “mingi bakúfi.”)

Soko nde to—soko nde tokomisosola biso moko, tokozua ekweli te. (Bomoni, soko tokomisosola biso moko tokozua ekweli te. Bomoni?)

Nde wana Nkolo asambisi biso, tozali kozua etumbu boye ete tokweisama esika moko na mokili te. (Bomoni, bakangami ata na mokili te.)

Bongo, bandeko na ngai, ntango bokoyangana mpo na kolia, bozelanaka bamoko na bamosusu. (Bomoni?)

Soko moto ayoki nzala, tika ete alia na ndako na ye, ete boyangana mpo na ekweli mabe te. Nakobongisa makambo oyo etikali ntango nakoya. (Bomoni?)


⁷⁴ Sikawa, na elobeli mosusu, koya te kaka mpo na kolia yango lokola . . . Ndenge nalobaki eleki mwa ntango, na ntina na oyo Bayuda, mbeka na bango, ba . . . Ezalaki malamumu mpenza, Nzambe moto apesaki yango, kasi ekómaki na ntango moko ete bazalaki lisusu te kosala yango na bosembo, na limemia pe na

molongo, na bongo ekómaki bobele . . . ekómaki nso—nsolo mabe na zolo na Ye.

⁷⁵ Sikawa, ezali ndenge moko ntango toyaka kolia elambo na Nkolo, bongo, esengeli ete toya na koyeba eloko nini tozali kosala. Ndenge moko lokola ntango ozali kokota na mai mpo na kobatisama na Nkombo na Nkolo Yesu Klisto, oyebi eloko nini ozali kosala, ozali komikokanisa na lingomba na nzela na oyo Nzambe atia kati na yo, Klisto.

⁷⁶ Ntango toliaka yango, etalisaka na lingomba ete, “nandimi Liloba moko moko ya Nzambe. Nandimi ete Azali Lipa na Bomoi oyo euti na Likolo epai na Nzambe. Nandimi ete Liloba moko moko oyo Alobi ezali Solo. Pe nazali kobika na Yango, na ndenge nayebi mpenza, Nzambe nde Mosambisi na ngai. Yango wana, na miso ya bandeko na ngai ya mibali, na miso ya bandeko na ngai ya basi . . . Na—nalapaka te, nalakelaka moto mabe te, nasalaka makambo oyo te, mpo ete nalingi Nkolo, Nkolo ayebi yango pe azali kotatola mpo na ngai. Yango wana, na miso na bino, nazali kolia eteni ya Nzoto na Ye, na boyebi ete nakweisami elongo na mokili te.” Bomoni, yango wana, na ntango wana ezali lipamboli.

⁷⁷ Pe, bomikanisela, nakoki kopesa matatoli ebele na ntina na yango, epai wapi nazuaki yango pe nalimbolaki yango na ndako ya lopitalo, pe namonaki babeli kobikisama.

⁷⁸ Bomikanisela, nsima na Yisalaele kolia yango lokola elili, basalaki mobembo ya mibu ntuku minei kati na lisobe kasi bilamba na bango ebebaki ata te, pe babimaki ata na moto ya bolembu moko—moko te kati na bango, na bato milió mibale lokola elili ya likambo oyo. Bongo, eloko nini bosolo ya elili yango ekosala? Soki nzoto ya nyama ya mbeka esalaki bongo mpo na bango, eloko nini Nzoto na Yesu Klisto, Emanuele, ekosala mpo na biso? Tozala na limemia mpenza wana tozali koya. Tozala na limemia mpenza na ndenge ekoki wana tozali koya. 

ELAMBO LIN65-1212
(Communion)

Liteya oyo ya Ndeko William Marrion Branham, eteyamaki liboso na Ngelesa mokolo mwa lomingo na mpokwa, mokolo mwa 12, sanza ya zomi na mibale, na mobu 1965, na Tucson Tabernacle na Tucson, Arizona, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2012 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org